

受我三月四事供養。時彼佛僧受王供已。佛即為王種種說法。王大歡喜。各發願言。持此供養善根功德。使我等輩在所生處。與其大王同日俱生。發是願已。各還所止。緣是功德。無量世中。不墮惡道。天上人中。共同日生。受天快樂。乃至今者。遭值於我出家得道。佛告阿難。欲知彼時槃頭末帝王者。今此罽賓寧比丘是。彼時羣臣者。今一萬八千比丘是。爾時諸比丘聞佛所說。歡喜奉行。

八九、拔提釋王作比丘緣

佛在舍衛國祇樹給孤獨園。爾時如來六年苦行。始成正覺。滿十二年。將千二百五十比丘。方欲往詣迦毘羅衛國。每自念言。我今往彼。不與常同。彼土諸釋。慳慢情多。咸須各各現於神變。可往彼土。即敕千二百五十比丘。我於今者。欲還本國。汝等各各現於神變。令彼諸釋歸誠信伏。爾時世尊放大光明。與諸比丘乘虛詣彼迦毘羅衛國。時淨飯王。聞佛來至。敕諸釋等平治道路。除去不淨。建立幢幡。懸諸寶鈴。香水灑地。散眾妙花。作諸

伎樂奉迎世尊。前禮佛足。請令入宮受王供養。時淨飯王見佛翼從。雖有神力形貌醜陋。不適人情。我今當選拔提釋等五百餘人容貌端正。翼從世尊作是語已。尋敕選擇得五百人。將詣佛所。使優波離剃除鬚髮。眼目流淚。墮釋王上。尋即問言。汝今何故涕泣如是。優波離言。以王今者諸釋中尊。不期一旦毀形麤食。著糞掃衣。見王如是。眼目流淚。時拔提釋聞是語已。心懷惆悵。猶生惱慢。除鬚髮竟。辦具衣鉢。欲受具戒。入於僧中。次第作禮。到優波離前。住而不禮。佛問釋王。汝今何故。獨而不禮優波離耶。拔提釋言。彼賤我貴。是以不禮。佛言。我此法中無有貴賤。猶如幻化。安危難保。拔提釋言。彼是我奴。不忍為禮。佛復告曰。一切奴僕貧富貴賤。恩愛分離。有何差別。時拔提釋聞佛語已。俛仰為禮。地大震動。天於空中歎未曾有。拔提釋王為求道故。乃能為彼下賤之人。曲躬跪拜。我慢之幢。將為崩倒。時拔提釋受具戒竟。卻坐一面。聽佛說法。心開意解。得阿羅漢果。執持應器而行乞食。詣於塚間。止宿樹下。心意泰然。無復怖畏。而作是言。我於昔日。在王宮時。募索健夫。執持器材。安置左右。故懷危懼。我於今者出家入道。在此塚間。無復怖畏。快不可言。爾時

阿難聞拔提釋作是語已。前白佛言。今此拔提釋比丘宿殖何福。生於豪族。出家未久。獲羅漢果。爾時世尊告阿難言。汝今聽吾當為汝分別解說。乃往過去無量世時。波羅捺國有辟支佛。執持應器。而行乞食。時有一人貧窮飢餓。涉路而行。唯有少餅。規欲自食。見辟支佛威儀庠序。而行乞食。心懷歡喜。尋即取餅。施辟支佛。受其餅已。踊身虛空。現十八變。東踊西沒。南踊北沒。身出水火。如是種種。作十八變時。施餅人見是變已。甚懷信敬。發願而去。緣是功德。無量世中。不墮地獄畜生。天上人中。尊榮豪貴。常受快樂。乃至今者。遭值於我。出家得道。佛告阿難。欲知彼時施餅人者。今此拔提釋王比丘是。佛說是緣時。有得須陀洹者。斯陀含者。阿那含者。阿羅漢者。有發辟支佛心者。有發無上菩提心者。爾時諸比丘聞佛所說。歡喜奉行。

九〇、佛度王子護國出家緣

佛在拘毘羅國。吐羅樹下。作是念言。我於今者。當往度彼王子護國。使令出家。作是